

Vun driweriver

erscheint auf www.lenauheim.de

monatliche
Erscheinung

Oktober 2017

von *Helen Alba*

Es war eemol es Schwowebad

Zur Kur in Kalatschea

Die Fieß, Ärm un es Gnack han nimmi so wille, wie ich des gheere ghat hätt. Un weil mer ach an sei Gsundheit denke muss, sin ich zum Dokter klaae gang. De Hausarzt hat mich unersucht, zur Sichherheit noch zu phaar Spezialiste gschickt un zu guter letscht hat de Rheumatologe mer gerot, uf Kalatschea ins Bad zu fahre, weil dorte es Thermalwasser am beschte em Rheuma an de Leib ricke tut.

Nohdem mer die Kurkarte kaft han, han mer uns erscht mol informiert, wie mer uf des Bad Kalatschea, guti 30 Kilometer vun Temeschwar entfernt, kumme kann. De erschte Stulpersteen war do: Ke Zug un ke Bus fahre dorte hin. Was jetz? Entweder mer flettiere bei Bekannti, dass se uns mitm Auto hinfiehere, oder mir wähle die „Hol-mich-mit“ Variante. Weil uns des nit gepasst hat, han mer uns mitm Taxi hinfahre gelosst. Vorher han mer noch im Kurort angeruft, for saan, dass mer kumme. Un han de Rotschlach kriet, ach im Behandlungszentrum anzurufe un uns for die ärztlich Unersuchung programmiere losse. Des war dann for um 10,30 Uhr feschtgeleet.

Dorte schun gleich morjets ankumm, han mer jo sofort unser Zimmer in der Villa Nummer siewe kriet. Drin wars angenehm kiehl, mir han uns bissl frisch gemacht un sin pinktlich beim Arztkabinett ankumm. Dorte han mer dann ghuckt un gewart. Ständich sin Leit aus de umliegende Ortschafte kumm. Un weil die es eilich ghat han, sin se der Reih noh sofort zur Dokterin nin gelosst gin. Ich han zwar nix gsaat, doch han ich mer meins gedenkt. Endlich noh drei Stunde is ach unser Reih kumm, die Dokterin hat uns grindlich unersucht un elektrischi, ionischi un Bادهprocedure verschrieb. Weils inzwische Essenszeit war, hat mer uns gerot, erschter zu Mittach zu esse un noher behandle losse.

In der Kantin war alles sauwer un es Esse hat gut gschmeckt. Noh der Behandlung han mer uns ausruhe misse, weil die an die Knoche anschlaa un uns ganz schlapp gemacht hat. Dernoh han mer uns e bissl rumgschau. De Kurpark is jo groß, doch außer vill Bänk un Bääm war nix zu besichtige. Mir han noh eener Alimantara oder Apethek Ausschau ghal – nix dergleichen war zu entdecke. Also han mer uns 15 Täch mitm Esse aus der Kantin zufriede gin misse. Wann mer uf e Gfornes oder Tschitro Gusta ghat han, han mer an der Rezepzion zu iwertriewene Preise inkaafe kenne. E Radio han mer vun derhem mitghol, im Zimmer war ach e Fernseher. Mir sin vill dorch de Park spaziere gang. Un die Täch sin schnell vergang, die Behandlung hat gut getun.

„Magdalenahof“ un „Marienheim“

Ich kann mich dran erinnre, dass in de 60er Jahre die Schwowe aus Bogarosch (un wahrscheinlich ach aus anre Derfer) mit Ross un Waan uf Kalatschea gfahr sin, um etwas fors Rheuma zu tun. Un drum han ich mich im Internet schlaue gemacht, seit wann es des Bad eigentlich git. Es soll als e deutscher Familienbetrieb entstann sin, dorch pure Zufall hat mer es Thermalwasser entdeckt: Die Gräfin Iphigenia d'Harcourt hat im Jahr 1904 uf ihrem Gut e Brunne bohre gelosst, was erfolglos war. Erscht e Jahr druf is mer in Tiefe vun 515 Meter uf Wasser gstoß. Es war awer ke Trink- sondern Thermalwasser mit eener Temperatur vun 39 Grad Celsius.

Anfangs 1910 han de Eheleit Stefan un Margareta Keller aus Orzydorf des Gut, uf dem die Thermalwasserquelle war, kauft. Em Orzydorfer Vetter Michael Anselm hat de Dokter im Jahr 1911 gerot, uf des Kellerscht-Gut zu fahre, dorte im Thermalwasser zu bade un so zu versuche, sei Rheuma zu lindre. Un es soll dem Vetter wirklich gholf han.

1912 han Kellersch dann zwaa Kammre mit Badewanne ingericht – des war de Anfang vum Bad Kalatschea, des wu e Jahr druf schun fünf ingerichtni Badezimmre ghat hat. Zu eem richtiche Kurort is Bad Kalatschea erscht noh dem Erschte Weltkrieche wore. Es Gebeide is uf 20 Badezimmre erweitert, e Gaschthaus ereffnet gin. Die Kurgäscht sin aus de Banater Derfer awer ach vun weiter her kumm, es hat was gemacht were misse, wu die Leit ach schlofe han kenne

So is newer em Badehaus de „Magdalenahof“ un 1926 es Gästehaus „Marienheim“ gebaut gin. Selmols is ach der großi Park angeleet wore. Alles is gut gang. Bis 1948 die Weiterentwicklung vum Kurbad unerbroch gin is. Die Familie Keller is enteignet un es Kurbad verstaatlicht gin. In de letschte Jahre hat mer versucht, des Kurbad wieder in Schwung zu bringe, doch is es de intressierte Investore nit gelung, alles so instand zu setze, wies sich gheert. Es Thermalwasser laaft weiter, die Zeit ach ...